

मॉर्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

1. उपराज्यपाल मनोज सिन्हा होरें बालटाल आले आधार शिविर च सेवा मुहैया करोआने आलें दी सराहना कीती। सैहल श्री अमरनाथ यात्रा दे धेइयै गी फही पक्का कीता।
2. मुख्यमंत्री उमर अब्दुल्ला होरें नोजवानें दा आह्वान कीता जे ओह सेवा, नमिएं काहडें ते अपने नेतृत्व कन्नै नमें जम्मू कश्मीर दे निर्माता बनन।
3. केन्द्र कृषि सचिव देवेश चतुर्वेदी होरें महत्वै आले कृषि संस्थानें दा लाया दौरा। जम्मू कश्मीर दे करसानें गी सैहयोग बधाने दा पाया प्रण।
4. मुख सचिव अटल डूल्लू होरें पनबिजली परियोजनाएं दा लेआ जायजा। परियोजनाएं दे तैहशुदा समें सीमा दे अंदर-अंदर सबूरा करने पर पाया जोर।
5. 6 ज्हार 979 श्रद्धालुएं दा चौथा जत्था अज्ज बडलै जम्मूदे भगवती नगर आधार शिविर थमां श्री अमरनाथ यात्रा लेई रवाना होआ।

<><><><><><>

LG Service Pro

उपराज्यपाल मनोज सिन्हा होरें कल बालटाल आधार शिविर दा दौरा कीता ते सेवा देने आले ते श्रद्धालुएं कन्नै गल्लबात कीती। उनें श्री अमरनाथ जी दी यात्रा गी सुचारू ते सुरक्षत बनाने च शामिल सब्बने पक्खें दे कम्में दी सराहना कीती। इस मौके पर तीर्थयात्रिएं आस्था ते विश्वास दी इस परम्परा यात्रा दा हिस्सा बनने पर अपने आपै गी बड़ा भागा दस्सदे होई प्रशासन दा धन्नबाद कीता। उपराज्यपाल होरें श्री अमरनाथ जी दी यात्रा दे शांतिपूर्ण ढंगै सिर तोड़ चाढ़ने आस्तै प्रशासन दे धेइयै गी फही पक्का कीता।

<><><><><><>

CM Skuast

मुख्यमंत्री उमर अब्दुल्ला होरें आखेआ ऐ जे जम्मू कश्मीर आर्थिक, समाजिक ते सियासी बदलाव दी बत्ता पर अगड़ा बधा'रदा ऐ। इनें नोजवानें दा आह्वान कीता जे ओह अपनी सेवा, नमिएं काहडें ते नेतृत्व कन्नै इस

बदलाव च सरगर्म हिस्सेदार बनन। मुख्यमंत्री स्कास्ट कश्मीर दे 6में दीक्षांत समारोह च बोला'रदे हे। स्नातकें गी संबोधत करदे होई मुख्यमंत्री होरें नोजवानें दा नमें जम्मू कश्मीर दे निर्माता बनने दा आह्वान कीता। उनें बशेष करी कृषि ते कन्ने लगदे सेक्टरें च रोजगार पैदा करने लेई नोजवानें गी प्रेरित कीता। उनें वायदा कीता जे सरकार उंदे बचारें ते योजनाएं गी समर्थन देग। उनें ज्ञान, दया भाव ते दलेरी दे तालमेल कन्नै जड़ें कन्नै जुड़े दे उंदे उज्जवल भविष्य दी कामना कीती।

<><><><><><>

Union Agri Sec

जम्मू कश्मीर दी कृषि पर आधारित अर्थबवस्था गी तगड़ा करने दी इस महत्वै आली गैई तैहत केन्द्री कृषि सचिव देवेश चतुर्वेदी होरें महत्वै आले कृषि संस्थानें दा दौरा लाया ते इसलै चला'रदिएं पैहलकदमिएं ते बाद्धे विकास दे नमें आयामें दी तपाश दा जाजया लैता। भारती अंतर्राष्ट्रीय कश्मीर केसर बपार केन्द्र च उनें केसर दी काश्त मगरा आले ढांचे दा जायजा लेआ ते केसर उत्पादकें दे समर्थन ते सैहयोग दा भरोसा दोआया। अपना मार्का देइयै उत्पादनं गी बजारें तगर पजाने दी प्रक्रिया पर जोर पांदे होई उनें आखेआ जे उत्पादन दे खरे भाह हासल करने दी लोड़ ऐ। उनें लालमंडी च मखीरे आली शोध लेबॉरेट्री दा बी जायजा लेआ ते बजारे तगर व्यापक पहुंच लेई मखीर दे प्रमाणीकरण पर जोर पाया। इस दौरे दरान उंदे कन्नै वरिष्ठ अफसर बी मजूद हे।

<><><><><><>

CS-Hydro

मुख्य सचिव अटल डुल्लू होरें जम्मू कश्मीर दे बक्ख-बक्ख दरेयाएं पर बनी दिएं पनबिजली परियोजनाएं दे विकास दी रफतार बधाने दी स्थिति दा जायजा लैता। पानी कन्नै पैदा होने आली बिजली गी जम्मू कश्मीर दी अर्थबवस्था दी रीढ़ दी हड्डी आखदे होई मुख्य सचिव होरें सब्बने परियोजनाएं गी तैह कीते गेदे समें दे अंदर अंदर पूरा करने लेई सांझियां कोशशें दा आह्वान कीता। उनें ऊर्जा सुरक्षा, उद्योगें दे बधदे विकास ते रोजगार पैदा करने च पनबिजली परियोजनाएं दे महत्वै आली भूमका पर लोह पाई। बैठक च जम्मू कश्मीर दे व्यापक पनबिजली समर्थ दे इस्तेमाल दे प्रशासन दे सशक्त धेइयै गी पही पक्का कीता गेआ ते आखेआ गेआ जे पनबिजली प्रांतै दी खुशहाली ते सतत विकास दा इक थम्म ऐ।

<><><><><><>

Bal Purskar

भारत सरकार नै प्रधानमंत्री राष्ट्री बाल पुरस्कार 2025 आस्तै नामांकन मग्गे न। एह पुरस्कार 6 कोला 8एं ब'रे दी बरेसु दे न्याणे गी दित्ता जाने आला सर्वोच्च नागरिक सम्मान ऐ। जेकी तुस बहादुरी, समाज सेवा,

वातावरण, खेड्ड, कला ते संस्कृति जां विज्ञान ते प्रौद्योगिकी जनेह् खेत्तरें च उपलब्धि हासल करने आले कुसै युग दे बारे जानदे ओ, तां मेहरवानी करियै उनेंगी हुन बी नामत करो। नामांकन जमा करने आस्तै 31 जुलाई 2025 दी समें सीमा गी शा पैहले awards.gov.in पर जाओ।

<><><><><><>

4th Batch-SANJY

सख्त सुरक्षा बंदोबस्त हेठ 6 जहार 979 श्रद्धालुएं दा चौथा जत्था जम्मू दे भगवती नगर यात्री निवास आधार शिविर थमां श्री अमरनाथ जी दी पवित्र गुफा दे दर्शनें आस्तै कश्मीर घाटी दी यात्रा आस्तै रवाना होआ। श्रद्धालु अज्ज बडलै 312 गड्डिएं दे काफले च आधार शिकवर थमां रवाना होए। इस जत्थे च 5 जहार 796 मर्द, 827 जनानियां, 24 न्याणे, 247 साधु, 84 साधवियां ते इक ट्रांसजेंडर शामिल न। उंदे चा 2 जहार 753 श्रद्धालु बालटाल आधार शिविर लेई रवाना होए, जिसलै के 4 जहार 226 श्रद्धालु पहलगाम आधार शिविर गे, जित्थुआं ओह पवित्र गुफा तगर अपनी यात्रा जारी रखगंन।

<><><><><><>

IGP Security

महत्वपूर्ण धार्मिक कार्यक्रमें दे दरान सुरक्षा जकीनी बनाने आस्तै इक जरूरी गैह चुक्कदे होई कश्मीर दे आईजीपी वी.के.बिरदी होरें चला'रदी श्री अमरनाथ जी दी यात्रा ते मुहर्रम आस्तै व्यापक सुरक्षा प्रबंधें गी रेखाकित कीता। उनें भरोसा दोआया ते पूरे खेत्तर च श्री अमरनाथ जी दी यात्रा ते मुहर्रम कन्नै सरबंधत दौनें कार्यक्रमें दे सुचारु ते सुरक्षित संचालन दे गारंटी देने आस्तै सब्बै लोडचदे गैह पुट्टियां गेइयां न। पुलस कुसै बी चिंता गी फौरी तौरा पर दूर करने लेई बिरादरी दे नेताएं ते मकामी अधिकारिएं दे कन्नै नेड़मा तालमेल बनाने दा ऐ। जम्मू कश्मीर पुलस शांति, सार्वजनिक बवस्था बनाई रखने ते सब्बने नागरिकें दे कल्याण आस्तै अपनी वचनबद्धता पर डटी दी ऐ।

<><><><><><>

Budha Amarnath

श्री बुड्डा अमरनाथ जी दी यात्रा 2025 दे शुरू होने शा पैहले डिप्टी कमीशनर पुंछ विकास कुडल होरें तैआरिएं दा जायजा लैने लेई कस्बे दा व्यापक दौरा कीता। वरिष्ठ अधिकारी ते यात्रा प्रबंधन कमेटी दे मिंबर बी इस मौके उंदे कन्नै हे। उनें विभाग गी निर्देश दित्ते जे ओह यात्रा दरान पीने आले पानी, बिजली, सफाई सुथराई, सेहत सहूलतें दी दस्तेयाबी, सुरक्षा ते ट्रैफिक प्रबंधन दी पक्की बवस्था जकीनी करन। बक्ख-बक्ख विभागें बश्कार तालमेल पर जोर पांदे होई डिप्टी कमीशनर होरें 24 घैंटे यात्रुएं दी सखाल ते मदाद लेई हाजर

रेड्यै श्रद्धालुएं दे मुआफक वातावरण तैआर करने पर जोर पाया। उन्हें अमन, सुरक्षा गी जकीनी करियै श्रद्धालुएं लेइ इस यात्रा गी यादगार बनाने दे प्रशासन दे धेइयै गी फही पक्का कीता।

<><><><><><>